

# Аллоҳ барча махлуқотларини жуда яхши билувчи Зотдир



19:00 / 07.05.2024 1499

Аллоҳ таоло Қуръони Каримда шундай марҳамат қилади:

﴿رَبُّرَّادَاوُدَ وَءَايَّتِنَا بَعْضَ عَلَى التَّيِّبِينَ بَعْضَ فَضَّلْنَا وَلَقَدْ وَالْأَرْضِ السَّمَوَاتِ فِي يَمِينِ أَعْلَمُ وَرَبُّكَ

**«Роббинг осмонлару ердаги кимсаларни яхши билувчидир. Батаҳқиқ, баъзи набийларни баъзиларидан афзал қилдик. Ва Довудга Забурни бердик»** (Исро сураси, 55-оят).

Роббул оламийн фақат ердаги одам болаларинигина эмас, балки:

**«Роббинг осмонлару ердаги кимсаларни яхши билувчидир».**

Унинг илми мутлақдир. Чексиздир, чегарасиздир. Ҳамма махлуқотларини жуда яхши билади. Ана ўша мутлақ илм асосида

**«Батаҳқиқ, баъзи набийларни баъзиларидан афзал қилдик».**

Мисол учун, баъзиларига китоб нозил қилдик, баъзиларига нозил қилмадик. Айримларига кўп ва катта мўъжизалар, айримларига оз ва кичик мўъжизалар бердик ва ҳоказо.

**«Ва Довудга Забурни бердик».**

Бу ҳам пайғамбарларнинг бирини бошқасидан афзал қилганимиз намунаси.

Шундай бўлгандан кейин, эй Пайғамбар, Аллоҳга ширк келтираётганларга

﴿مَحْوِيلًا وَلَا عَنْكُمْ الضَّرَّ كَشَفَ يَمَلِكُوتَ فَلَادُونِيهِ مَنْ زَعَمْتُمْ الَّذِينَ أَدْعُوا قُلُوبًا﴾

**«Сен: «Ундан ўзга ўзингизча гумон қилганларингизни чақиринг. Бас, улар сиздан зарарни кушойиш қила олишга ёки буриб юборишга молик эмаслар», - деб айт» (Исро сураси, 56-оят).**

Мушриклар ўзларича Аллоҳга ширк келтириб, ўша шерик худоларидан умидвор бўлиб юрибдилар. Аллоҳнинг ягона ибодатга сазовор Зот эканини ва бошқа сифатларини инкор қилмоқдалар. Қани, Аллоҳдан ўзга, ўзларича худо деб гумон қилиб юрган ўша бут, жин, инс ёки бошқа нарсаларини чақирсинлар-чи, уларга ёрдам бера олармикинлар? Йўқ, сохта худолари улардан ҳеч бир зарарни кушойиш қила олмайдилар. Улар зарарни бошқа томонга буриб юборишга ҳам қодир эмаслар. Балки улар ҳам Аллоҳнинг яратган нарсаларидир.

﴿مَحْذُورًا كَانَ رَبِّكَ عَذَابَ إِنَّ عَذَابَهُ وَيَخَافُونَ رَحْمَتَهُ. وَيَرْجُونَ اقْرَبُ إِلَيْهِمْ أَلْوَسِيلَةَ رَبِّهِمْ إِلَيْكَ يَبْتَغُونَ يَدْعُونَ الَّذِينَ أَوْلَيْتَكَ﴾

**«Ана ўша дуо қилаётганлари Роббларига васила изларлар, қайсилари яқинроқ эканини (билмоқчи бўлурлар). Унинг раҳматини орзу қилурлар ва азобидан қўрқурлар. Албатта, Роббингнинг азоби ҳазир бўлишга лойиқдир» (Исро сураси, 57-оят).**

Мушриклар яралмишларни ўзларига илоҳ деб эътиқод қилиб, ўшаларга дуо – ибодат қилиб, ҳожатларини сўраб юрибдилар. Ҳолбуки, уларнинг

**«Ана ўша дуо қилаётганлари Роббларига васила изларлар, қайсилари яқинроқ эканини (билмоқчи бўлурлар)».**

Чунки аслида улар худо эмас, Худонинг махлуқларидирлар. Улар ўзларининг ожизликларини, Аллоҳдан узоқлашсалар, ишлари чатоқ бўлишини ҳам яхши биладилар. Шунинг учун ҳаммалари Аллоҳ таолога яқин бўлиш учун васила излайдилар. Аллоҳга муқарраб бўлиш учун мусобақа қиладилар. Мушриклар эса ана шуларни ўзларига худо деб юрибдилар. Уларнинг раҳматига етишни орзу қилиб, азобидан қўрқиб юрибдилар. Ҳолбуки, уларнинг бу сохта худолари Аллоҳнинг

**«...раҳматини орзу қилурлар ва азобидан қўрқурлар».**

Ўзи Аллоҳнинг раҳмати орзусида юрган кимса қандай қилиб бировни раҳмат қила олади? Ўзи Аллоҳнинг азобидан қўрқиб турган кимса қандай қилиб бировни азоблай олади? Буни мушриклар тушуниб етишлари керак. Бўлмаса, Аллоҳнинг азобига дучор бўладилар.

**«Албатта, Роббингнинг азоби ҳазир бўлишга лойиқдир».**

Шунга қарамасдан, Аллоҳнинг азобидан қўрқмай, бир пулга арзимайдиган нарсаларни Унга шерик қилиб юрганларга ҳайронсан.

***«Тафсири Ҳилол» китоби асосида тайёрланди***